



ILIDŽA

INFORMATIVNI BILTEN OPĆINE ILIDŽA
BROJ 159 • ILIDŽA • APRIL 2017



Posjeta ilidžanskih osnovaca
Memorijalnom centru Potočari

www.opcinailidza.ba



Donesena Odluka o dodjeli na korištenje i upravljanje sistema kino projekcije u JU KSiRC Ilidža

Općinsko vijeće Ilidža donijelo je i Odluku o dodjeli na korištenje i upravljanje sistema kino projekcije Javnoj ustanovi Kulturno-sportski i rekreacioni centar Ilidža. Pokretna imovinom dodjeljuje se na upravljanje bez naknade na period u trajanju od četiri godine. Na osnovu ove odluke Općinski načelnik i JU KSiRC Ilidža zaključit će Sporazum o regulisanju međusobnih prava i obaveza u vezi sa korištenjem sistema kino projekcije.

Usvojen Izvještaj o izvršenju Budžeta za tri mjeseca

Vijeće je usvojilo i Prijedlog izvještaja o izvršenju budžeta Općine Ilidža za 01.01-31.03.2017. godine. Ukupno ostvareni prihodi i primici iznose 5.839.324,84 KM, a rashodi i izdaci 4.326.637,13 KM. Razlika u iznosu 1.512.687,71 KM prenosi se u Budžet za naredni period.



Rebalansom, Budžet Općine Ilidža 33.300.000 KM

Općinsko vijeće Ilidža na sjednici 27. aprila 2017. godine u Multifunkcionalnoj sali usvojilo je Izmjene i dopune Budžeta Općine Ilidža za 2017. godinu sa 20 glasova ZA i sedam PROTIV, u iznosu 33.300.000 KM. Izmjenama i dopunama Budžet je povećan sa 24.000.000 KM na 33.300.000 KM. Najviše sredstava ovim povećanjem trošit će se na kapitalne projekte, obrazovanje i sport.

Izbori za Savjet MZ Stup II 14. maja

Jedna od tačaka dnevnog reda bila je i Odluka o održavanju izbora za članove Savjeta MZ Stup. Ovom odlukom Općinsko vijeće Ilidža vršeći pravo nadzora nad radom organa MZ Stup II utvrdilo je da će se izbori za članove Savjeta MZ održati 14. maja, u nedjelju, od 8-18 sati.

U skladu sa Pravilima MZ Stup II, u Savjet će se birati sedam članova. Savjet MZ Stup II treba da 5. maja, u petak, u 17 sati održi Zbor građana do izbora predsjednika Zbora građana, a vodit će ga član Savjeta MZ kojeg će oni i ovlastiti. Prilikom izbora predsjednika Zbora obaveza je da se svi prisutni građani potpišu lično na izvod Centralnog biračkog spisaka.

Usvojen Izvještaj o izvršenju budžeta i završni račun za 2016. godinu

Općinsko vijeće na šestoj redovnoj sjednici održanoj, 27. aprila 2017. godine usvojilo je Izvještaj o izvršenju budžeta Općine Ilidža za 2016. godinu, Godišnji finansijski izvještaj za period 1. januar – 31. decembar 2016 godine i Izvještaj Centralne popisne komisije za koordinaciju rada popisnih komisija za 2016. godinu i Odluku o rasporedu viška prihoda nad rashodima Općine Ilidža za 2016. godinu. Ukupno ostvareni prihodi u 2016. godini iznose 24.600.443,47 KM, a rashodi 24.679.030,26 KM. Razlika između ostvarenih prihoda i rashoda je 78.586,79 KM i pokriva se iz viška prihoda predhodnih godina, a raspored viška prihoda, primitaka i rashoda i izdataka za 2016. godinu će biti izvršen posebnom odlukom. Vijeće je usvojilo i Izvještaj o izvršenju budžeta Općine Ilidža za period 1. januar 31. mart 2017. godine i Periodični finansijski izvještaj za isti period. U ovom periodu ukupno ostvareni prihodi i primitci iznose 5.839.324,84 KM, a rashodi 4.326.637,13 KM. Razlika između ostvarenih prihoda i primitaka i rashoda i izdataka je 1.512.687,71 KM i prenosi se budžet za naredni period.

Informacije

Vijećnici upoznati sa revizijom finansijskih izvještaja Općine Ilidža

Općinski vijećnici Ilidža upoznati su sa Revizijom finansijskih izvještaja Općine Ilidža za 2015. godinu nezavisnog revizora firme Revisium Consult d.o.o, o obavljenoj reviziji finansijskih izvještaja Općine Ilidža za 2015. godinu. Prema mišljenju revizije finansijski izvještaji Općine Ilidža po svim bitnim pitanjima prikazuju istinito i objektivno stanje imovine i obaveza na dan 31.12. 2015. godine, rezultate poslovanja, a izvršenje budžeta za 2015. godinu je u skladu sa prihvaćenim okvirom finansijskog izvještavanja. Provođenjem procedura između ostalog, utvrđeno je da postoje značajna potraživanja od Ministarstva za boračka pitanja Kantona Sarajevo. Prokolom koji je potpisan između Ministarstva i Općine, regulisana je dinamika isplata naknada za oslobađanje troškova naknade za pogodnosti i uređenje građevinskog zemljišta za izgradnju objekata individualnog stanovanja i za izgradnju poslovnih prostora za pripadne boračke populacije. Prema protokolu obaveza Ministarstva za boračka pitanja za refundaciju

općinama nastaje tek po izdavanju građevinskih dozvola. Refundacija troškova od strane Ministarstva i značajna potraživanja po osnovu naknade za oslobađanje troškova nastala su u periodu od 1.1.2015. godine nisu naplativa jer za isplatu u najvećem broju slučajeva nisu ishodovane građevinske dozvole. Uvidom u evidenciju stalnih sredstava, revizija je utvrdila da općina Ilidža za revidirani period evidentirala povećanje stalnih sredstava u iznosu 2.428.079 KM. Općina je za revidirani period evidentirala povećanje vrijednosti građevina u iznosu 1.745.321 KM. Revizija je utvrdila da je Općina Ilidža izvršila evidentiranje građevina po osnovu rješenja Službe za imovinsko-pravne, stambene, geodetske poslove i katastar nekretnina o praćenju pogodnosti za rentu za legalizaciju objekta MZ Sokolović-Koloniji u iznosu 23.422 KM i MZ Donji Kotorac 2.422 KM. Smanjenje materijalnih sredstava je evidentirano po osnovu otpisa i po osnovu obračuna amortizacije.

Na sjednici Vijeća bila je i Informacija o zimskom održavanju cesta na području općine Ilidža za 2016-2017. godinu koju je vijeće primilo k znanju. Informacija je bazirana kroz tretman uklanjanja snijega sa kolovoza sa pratećim aktivnostima neophodnim za odvijanje bezbjednog pješačkog i motornog saobraćaja, te održavanju saobraćajne signalizacije. Zimsko održavanje saobraćajnica provođeno je u periodu od 15. novembra 2016. do 15. marta 2017. godine po utvrđenim prioritetima sa određenim i osposobljenim bazama i mehanizacijom opremljenom za izvođenje radova. Nadzor nad poslovima zimskog održavanja lokalnih cesta provođen je putem Službe za razvoj, komunalne poslove i puteve uz pomoć sekretara mjesnih zajednica.

Vijeće je na sjednici primilo k znanju i informacije o provođenju Zakona o pravima branilaca i članova njihovih porodica i Zakona o posebnim pravima dobitnika ratnih priznanja i odlikovanja i članova njihovih porodica za period 1. januar-31. decembar 2016. godine.

U Informaciji je istaknuto da pripadnici boračke populacije, putem Službe, na brz i efikasan način mogu ostvariti prava koja joj pripadaju u skladu sa Zakonom kojim su uređeni uslovi, način i postupak za ostvarivanje prava ratnih vojnih invalida i članova njihovih porodica, članova porodica šehida, članova porodica poginulih, umrlih i nestalih branitelja i prava demobilisanih branilaca dobitnika ratnih priznanja i odlikovanja, ratnih vojnih zarobljenika i demobiliziranih branitelja kao i lica zaslužnih u odbrambeno-oslobodilačkom ratu.





Potpisan sporazum o saradnji Privredne komore FBiH i Poljoprivredne komore Mađarske

U Hotelu Hills 13. aprila na Ilidži, potpredsjednik Privredne komore FBiH Mirsad Jašarspahić i predsjednik Poljoprivredne komore Mađarske Balazs Gyorffy, potpisali su Sporazum o saradnji između Privredne /Gospodarske komore FBiH i Poljoprivredne komore Mađarske.

Svečanom potpisivanju Sporazuma prisustvovao je Ambasador Republike Mađarske u BiH, H.E. Mr. Jozsef Negyesi i načelnik Općine Ilidža prof.dr. Senaid Memić.

Nakon kratkih prezentacija

dviju Komora prisutni Klas Sarajevo, Dukat iz Tešnja, Bosman, Bosnet, Eko sir Puđa, Srebreničanka, Aida Kommerce, Eko selo Boračko jezero i Zadružni savez FBiH su u kratkim crtama predstavili svoje firme i dali konkretne prijedloge za otpočinjanje intenzivnije privredne saradnje sa mađarskim kolegama.

Do organizacije ove poslovne posjete došlo je angažmanom Bosansko -mađarskog udruženja koje je u saradnji sa Centrom za međunarodnu saradnju P/G komore

FBiH dogovorilo sastanak i time još jednom pružilo priliku domaćim privrednicima da ostvare direktnu poslovnu saradnju sa mađarskim kolegama.

Načelnik Općine Ilidža prof.dr. Senaid Memić, u svojstvu domaćina ovog skupa zaželio je dobrodošlicu gostima izrazivši nadu da će saradnja biti kvalitetna i da će obje strane imati koristi.

Delegacija iz Teherana u posjeti Općini Ilidži

Delegacija 12. općine Grada Teherana predvođena načelnikom Abed Mohammad Malekijem posjetili su 12. aprila Općinu Ilidža. Domaćin, načelnik Općine Ilidža prof.dr. Senaid Memić upoznao je delegaciju sa ekonomskom situacijom u općini, privrednim i turističkim potencijalima kao i o budućim razvojnim projektima ove lokalne zajednice. Iskazan je obostrani interes za saradnju kako po pitanju kulture i sporta, tako i mogućnostima ulaganja u privredni sektor, što bi za rezultat imalo otvaranje novih radnih mjesta.

"Općina Ilidža je otvorena općina za saradnju. Mi vas smatramo svojim prijateljima jer ste to bili kad je BiH bilo najteže. Projekata je mnogo, a i

volje za moguću dobru saradnju" izjavio je, između ostalog, Memić.

Načelnik Maleki predstavio je potencijale općine na čijem je čelu podcavši da Sarajevo, a i Ilidža kao dio njega se smatra prijateljskim gradom za sve dobronamjerne ljude. Prvi korak u saradnji bio bi potpisivanje Sporazuma o bratimljenju, rekao je Maleki. Teheran je višemilionski grad, jedan od najvećih na svijetu, u kojem živi oko 12 miliona stanovnika. Grad čine 24 općine. Danas je Teheran daleko najvažnije političko, privredno, obrazovno prometno i kulturno središte Irana. U njegovoj okolini nalazi se 50 posto iranskih industrijskih postrojenja, a odlikuje se i kvalitetnom

gradskom odnosno razvijenom izvangradskom prometnom mrežom.

Gosti iz Irana su izrazili želju da načelnik sa saradnicima posjeti njihovu općinu kako bi se saradnja nastavila.





Memorijalni centar Potočari posjetilo 700 učenika



U cilju odavanja počasti žrtvama genocida već desetu godinu zaredom, Općina Ilidža organizovala je posjetu učenika ilidžanskih osnovnih škola Memorijalnom centru Potočari. Na put u Potočare u ranim jutarnjim satima 27. aprila 2017. godine, u 11 autobusa u pratnji policije, nastavnika i predstavnika Općine, krenulo je 700 učenika sedmih razreda iz 12 osnovnih škola sa područja općine Ilidža. Učenike, nastavnike, predstavnike roditelja i organizatore uoči polaska ispratili su roditelji i direktori škola i zaželjeli im sretan put.

U okviru posjete, pored odavanja počasti žrtvama genocida učenjem Fatihe i polaganjem cvijeća, obilaska Memorijalnog centra i mezarja, za učenike je organizovan čas historije na kojem su se upoznali o stravičnom zločinu nad Bošnjacima u tadašnjoj enklavi Srebrenica te projekcija filma „Srebrenica 95“, obilazak izložbe i spomen sobe, a pručena je i Jasin dova za sve stradale.

Muk tišine u Potočarima govori više od riječi. Normalnom ljudskom biću je neshvatljiva mržnja koja je rezultirala višednevnom pokolju, samo zato jer su se drugačije zvali. Kakvi ljudi ubiše tolike očeve, braću i sinove, a majke, sestre, supruge i kćerke i dan danas

traže kosti svoje djece, braće, muževa i očeva razbacanih po bosanskoj zemlji? Malo ko bi znao odgovor.

"Zato djeco zapamtite ono što ne možete čuti u školi u 20 vijeku u srcu Evrope učinjen je genocid, koji odnese 11.000 nevinih žrtava, a zločinci, šetkaju se na slobodi" rekao je na historijskom času predavač Azir Osmanović, čije riječi nisu ni jedno djetе ostavili ravnodušnim.

„Ovdje što se dogodilo vašim vršnjacima ne ponovilo se nikad nikome na planeti zemlji“ poručio je osnovcima.

Za sve učenike, pored prevoza, Općina je obezbjedila sendviče, napitke i medicinsku pratnju za koju je bilo zaduženi „Paramedic“ i Dom zdravlja Ilidža sa svojim vozovima i medicinskim ekipama. Kao tehnička podrška i pratnja bila je i ekipa Gorske službe spašavanja Ilidža. Sa ovom posjetom, do sada, Memorijalni centar u Potočarima posjetilo oko 7000 učesnika osnovnih škola sa područja općine Ilidža. Za ovaj humani i edukativni projekat općina je iz budžeta izdvojila 13.000 KM, a koji će se i u buduće nastaviti.

Dan kada je odbranjena Ilidža



U organizaciji Patriotske lige Ilidža, Udruženja 4. Viteške motorizovane brigade i Općine Ilidža, 22. aprila 2017. godine ispred Pete osnovne škole u Sokolović-Koloniji održan je tradicionalni memorijalno-historijski susret pod nazivom „Dani odbrane Ilidže“.

U prisustvu velikog broja građana, delegacije Općine Ilidža, udruženja boraca, političkih stranaka, rodbine i prijatelja položile su cvijeće ispred spomen-obilježja i učenjem Fatihe, minutom šutnje odali počast šehidima, poginulim borcima i civilnim žrtvama rata.

Ministar za boračka pitanja Kantona Sarajevo Muharem Fišo u svom obraćanju prisutnim istakao je da imamo dug i obavezu prema poginulim da se nikad ne zaborave i da nisu uzalud dali svoje živote kako bi mi danas živjeli slobodni. «Ovo mjesto i ovaj datum su najznačajniji u odbrani ne samo Ilidže već i cijele Bosne i Hercegovine, to je dan kada je agresor doživio prvi poraz» kazao je Fišo.

Komandant Odreda „22. april“ i učesnik ove sudbonosne bitke Mirsad



Mirojević kazao je da su se borci hrabro suprostavili tadašnjoj četvrtoj vojnoj sili u Evropi izdajničkoj JNA. «Ovo je najznačajniji dan u istoriji Ilidže, dan kada je narod odlučio da se bori za Bosnu i Hercegovinu i dan kada je pokazao da će opstati. Lijepo je što postoje ovakve manifestacije na kojima se borci sretnu i prisjete ratnih dana» smatra Mirojević.

U okviru obilježavanja ovog značajnog datuma položeno je cvijeće na Centralno spomen-obilježje ispred zgrade Općine Ilidža i ispred Ratne bolnice „Čamil Marić“ u Hrasnici. Upriličena je i memorijalna šetnja u kojoj su učestvovali učenici šestih razreda svih škola sa područja Ilidže, a išli su ratnim putem od Instituta do Pete osnovne škole. Održan je i turnir u malom nogometu osnovnih škola sa područja Ilidže, te izložba ratnih fotografija, takmičenje u prvoj pomoći i ekološka akcija čišćenja naselja. Prigodan program izveli su učenici Pete osnovne škole, obilježivši i Dan mjesne zajednice Sokolović-Kolonije, te godišnjicu Odreda „22.april“ i formiranje Ratne bolnice „Čamil



Hajrudin Klepo je hrabro poginuo i nije zaboravljen

U organizaciji Općine Ilidža i Udruženja organizatora otpora veterana rata, dobrovoljaca, prvoboraca i branilaca „Zelene beretke“, 5. aprila 2017.godine u prisustvu rodbine, prijatelja, saboraca, predstavnika boračkih udruženja i Općine, obilježena je godišnjica pogibije šehida Hajrudina Klepe. Članovi porodice Hajrudina Klepe, delegacije Općine, Zelenih beretki i Četvrte viteške brigade položili su cvijeće na mezar i kod mjesto pogibije na spomen obilježje i proučili Fatihu i odali počast ovom šehidu.

„Rahmetli Hajrudin se među prvima priključio Zelenim beretkama i aktivno se uključio u akciju izuzimanja oružja i MTS-a iz baze u Krtelju. Prilikom jednog od mnogobrojnih ulazaka u bazu u pokušaju da osposobi transporter, hrabro je poginuo od snajperskog hica“, kazao je u svom obraćanju Fikret Delić, nosilac „Zlatnog ljljana“ i neposredni učesnik ove akcije.

Prigodan program izveli su članovi Udruženja za očuvanje tradicije „Bašlija“.

Obilježena godišnjica bitke za Koščan

Na brdu Koščan, 29. aprila 2017. okupilo se nekoliko stotina građana kako bi se na dostojanstven način obilježila 24. godišnjica odbrane jedne od važnijih strateških tački odbrane Sarajeva u toku agresije na BiH u periodu 92-95. Brojne delegacije su na spomen-obilježju Koščan položile cvijeće i proučile Fatihu poginulim borcima i šehidima.

U programu obilježavanja učestvovali su učenici Devete osnovne škole Rakovica. Bila je ovo i prilika za druženje saboraca, učenika, građana i gostiju u logoru "Koščan" koji su za tu priliku formirali Odred izviđača Rakovica 9. U sklopu obilježavanja „Odbrane Koščana“ u Rakovici je istog dana položeno cvijeće na spomen obilježje. Manifestaciju su realizovali Općina Ilidža i Udruženje boraca „Veterani rata 1992-1995. Rakovica“.



DIO "Fikro" obilježio 25 godina

Ekipe Druge i Četvrte gimnazije najuspješnije

Prvog aprila održano je 22. općinsko takmičenje iz prve pomoći "Ratna bolnica Čamil Marić" u Petoj osnovnoj školi.

Učestvovali su ekipe iz svih osnovnih i srednjih škola sa područja općine Ilidža. Sve ekipe pokazale su zavidna znanja i umjeća prilikom spašavanja.

Najuspješnija je bila ekipa Druge osnovne škole i Četvrte gimnazije. Drugoplasirane su bile ekipe Prve osnovne i Međunarodne srednje škole, dok je treće mjesto u kategoriji podmlatka bila ekipa Pete osnovne škole.

Ratna bolnica ove godine obilježava 25. godišnjicu od osnivanja i djelovanja.



U organizaciji Udruženja Četvrta viteška motorizovana brigada 9. aprila 2017. godine obilježena je 25. godišnjica formiranja Diverzantsko-izviđačkog odreda "Fikro." Položeno je cvijeće na spomen-stećak ovog odreda u Hrasnici, a održana je i svečana akademija u bivšem kinu Igman na kojoj su evocirane uspomene na ratni put ovog odreda.

Kako je rečeno diverzanti "Fikro" bili su nukleus odbrane Ilidže, odnosno Sokolović-Kolonije, Butmira i Hasnice.

Ratni komandant Četvrte viteške brigade Fikret Prevljak rekao je kako je DIO "Fikro" bila multietnička jedinica, koja je na početku brojala 150 hrabrih momaka, a poslije je preasla u



odred gdje je bilo 400 diverzanata. "Svoje živote za odbranu Ilidže i Sarajeva dala su 72 pripadnika. Diverzanti su dali ogroman doprinos u odbrani ovih naselja i bili su garancija sigurnosti narodu na ovim područjima. Kada su trebali ići na druge ratišta stanovnici se nisu osjećali sigurno, jer su u njih gledali kao zaštitnike. Bili su složni i jedinstveni, a nadasve hrabri" izjavio je Prevljak.

Obilježen 6. april Dan oslobođenja Sarajeva

U organizaciji Udruženja antifašista i boraca narodnooslobodilačkog rata Ilidža polaganjem cvijeća u Velikom parku na Ilidži obilježen je 6. april, 72. godine od oslobođenja grada Sarajeva. Cvijeće su položile delegacije Općine Ilidža, Općinskog vijeća, Saveza antifašista NOR-a BiH, Udruženja antifašista općina Ilidža i Hadžići, te delegacija OO SDP-a. "Ovdje pored spomen kosturnice na čijim pločama je uklesano 99 imena, poginulih boraca Ilidžanaca u NOB-a došli smo da im odamo počast. I da poručimo da ćemo mlađim generacijama prenositi historiju, a i poruku se bore protiv svih podijela. Šesti april najznačajniji je datum u historiji Sarajeva i mi ćemo čuvati uspomenu na taj dan" rekao je Nikola Babić, predsjednik Upravnog odbora UABNOR-a Ilidža.

Prije 72 godine, 6. aprila 1945. godine, Sarajevo je oslobođeno od okupacije nacističke Njemačke tokom Drugog svjetskog rata. Isti datum, 47 godina kasnije, 6. april 1992. simbolizira početak opsade Sarajeva u proteklom ratu u BiH. Zbog toga se 6. april obilježava kao dan oslobođenja grada u Drugom svjetskom ratu i kao Dan grada.





Zamijenjena stolarija u Četvrtoj gimnaziji na Ilidži

Ona narodna izreka da sloga kuću gradi pravi je primjer ,Općina Ilidža. Solidarnost, darežljivost i vrijedne ruke mogu sve, pa tako da pobijede i besparicu.

Na zgradi Četvrte gimnazije na Ilidži završeni su radovi na zamjeni stolarije na prvom spratu, novom pvc stolarijom sa termoizolacionim staklima. Riječ je o donaciji firme Euroinvest BiH. Zahvaljujući dobrim ljudima iz ove firme koji su željeli pomoći nekom iz lokalne zajednice, i na prijedlog načelnika općine Ilidža prof. dr. Senaida Memića odabrali su Četvrtu gimnaziju kojoj su i poklonili sredstva. Donirano je 20 .000 KM koja su potom utrošene za zamjenu stolarija na prvom spratu. Nova stolarija je postavljena u šest kabineta. Izvođač radova je bila firma Zeno plastel.

Direktor Četvrte gimnazije Elvir Korjenić izrazio je zahvalnost Općini Ilidža i donatorima firmi Euroinvest BiH .

"Stolarija u nekim dijelovima i baš u ovom nije mijenjana od 1991. godine. Prozori su bili dotrajali, a neki se nisu mogli ni zatvarati. Realizacijom ovog projekta u našoj školi sada je zamijenjena kompletna stolarija na prvom spratu , tako da učenici i uposlenici škole imaju bolje uslove i imat će i toplije učionice za rad. Time će se doprinjeti poboljšanju uštede toplotne energije, školske prostorije bit će lakše zagrijati, a škola je poprimila i ljepši izgled. Zahvaljujemo i donatorima i načelniku Općine Ilidža prof.dr. Senaidu Memiću koji su prepoznali našu potrebu i riješili naše probleme, a sve u interesu stvaranja što boljih uslova za rad našim učenicima" dodaje Korjenić.



Školski bazar u Drugoj osnovnoj školi

Ove kao i predhodnih godina Druga osnovna škola organizovala je Školski bazar koji je ove godine održan 21. aprila 2017 godine u prostorijama škole, a u čijoj realizaciji su učestvovali učenici, roditelji, Vijeće roditelja, uposlenici i menadžment škole. Učenici su zajedno sa nastavnicima izložili svoje kreacije koje su radili na sekcijama tokom godine, a roditelji svoje prehrambene proizvode. Bazar je bio prodajnog karaktera. Jedan dio ostvarenog prihoda od prodaje izloženih artikla ići će za ekskurziju, jedan dio u humanitarne, solidarne svrhe, a jedan za potrebe učenika i škole.

Cilj projekta je da se učenici, nastavnici, roditelji i stanovnici naselja kroz kreativan i human rad druže i zabave što najbolje govori slogan ovogodišnjeg Bazara „Kad se mnogo ruku složi tad se snaga sto puta množi“.



Bazar u Trećoj osnovnoj školi

Treća osnovna škola organizovala je tradicionalni Školski bazar koji je održan 25. maja 2017 godine u prostorijama škole, a u čijoj realizaciji su učestvovali učenici, roditelji, Vijeće roditelja, uposlenici i menadžment škole. Učenici su zajedno sa nastavnicima izložili svoje kreacije koje su radili na sekcijama tokom godine, a roditelji svoje prehrambene proizvode. Bazar je bio prodajnog karaktera. Prihod od prodaje izloženih artikla upotrijebit će se za poboljšanje uslova škole. Cilj projekta je da se učenici, nastavnici, roditelji i stanovnici naselja kroz kreativan i dobrovoljan rad druže i zabave i pomognu svojoj školi.

Počela izrada četvrte Strategije za mlade 2017-201

Mladi predstavljaju bitan dio društvene zajednice, ali ujedno i ciljnu grupu koja je ponajviše marginizirana u procesima donošenja odluka i koja ima loš položaj u BiH.

Kroz saradnju sa Udruženjem KULT, Općina Ilidža uvidjela je potrebu za sistemskim, planskim i strateškim pristupom u rješavanju problema i zadovoljavanju potreba mladih ljudi. Lokalna strategija prema mladima pokazala se kao dokument koji omogućava organiziranu i plansku brigu o mladima, za čije aktivnosti Općina Ilidža osigurava finansijska sredstva iz budžeta.

Strategija prema mladima jest dokument koji društvena zajednica izrađuje u cilju poboljšanja položaja mladih. Općina Ilidža pristupila je izradi četvrte po redu Strategije, koja će se posmatrati kao sastavni dio dobrog upravljanja i kojom će se provesti određene aktivnosti.

Usvajanjem Strategije osigurava se održiva podrška mladima i njihovo institucionalno djelovanje. U Općini Ilidža je 21. aprila 2017. održana prva obuka za članove radne grupa za izradu Strategije za mlade Općina Ilidža. Prilikom određivanja prioriternih problema razvrstane su razne oblasti i na osnovu toga su formirane i radne grupe koje će odrediti osnovne probleme i željene rezultate.

I Općinsko vijeće i načelnik uključeni su u cijeli proces izrade dokumenta.



Podijeljena 22 paketića

U povodu Uskrsa i Vaskrsa u organizaciji Udruženja "Zlatna ruka" u prostorijama boračkih udruženja upriličena je podjela paketića za djecu bez roditelja. Podijeljeno je 22 paketića. Ta gesta obradovala je mališane da se neko sjetio njih, te su izrazili veliku zahvalnost udruženju.

Predstavnici "Svjetla" izrazili zahvalnost



Organizacija altruista Svjetlo, mladi sa umanjnim intelektualnim sposobnostima izrazili su zahvalnost načelniku Općine Ilidža na pomoći koju im pruža u realizaciji njihovih projekata.

"Mi želimo da vam pružimo podršku kako biste mogli iskazati svoje sposobnosti i biti sretni u tome što radite. Izražavam lično duboko poštovanje za vaš nesebičan rad i angažman sa osobama koje zaslužuju brigu, pažnju i ljubav. Vaše aktivnosti, život vašim članovima čine ugodnijim i na njihovim licima se vidi da su sretni" rekao je, između ostalog, načelnik Memić.

Barbara Čaušević direktorica Svjetla zahvalila je načelniku na pomoći koju je Općina Ilidža pružala kao podršku u njihovom radu i ostvarenju mnogih snova mladih sa umanjnim sposobnostima, te izrazila nadu da će se saradnja nastaviti i u budućnosti.

"Mi nastavljamo našu viziju, a to je da se stvori društvo bez barijera i stavova koji vode diskriminaciji i socijalnom isključivanju osoba sa umanjnim sposobnostima" dodala je Čaušević.

Proslavljen Dan Četvrte gimnazije

Četvrta gimnazija Ilidža 5. aprila proslavila je svoj 56. rođendan. Tim povodom održana je prigodna svečana priredba koju su pripremili učenici škole. Svim prijateljima ove obrazovne institucije uručene su zahvalnice.

Gimnazija „Igmanski marš“ na Ilidži osnovana je Odlukom Narodnog odbora Općine Ilidža 21. juna 1961. godine i značila je ostvarenje davnajšnje želje stanovnika Ilidže. Bila je jedina srednja škola u SFRJ i SR BiH sa imenom legendarnog marša iz Drugog svjetskog rata koja se sve do rata 1992. godine redovno uključivala u tradicionalni marš „Tragom Igmanaca“. Škola zadržava ovaj naziv do 1994. godine kada odlukom Skupštine Grada od 17. 11. mjenja naziv u Četvrta gimnazija.



Dan dječije knjige

U povodu Svjetskog dana knjige, a u organizaciji Javne ustanove za kulturu, sport i rekreaciju 28. aprila 2017. godine u prostorijama multifunkcionalne sale Doma kulture organizovana je manifestacija Dan dječije knjige.

Učenici su mogli da se druže sa afirmisanim bh. piscem za djecu i mlade Mirsadom Bećirbašićem.

Manifestaciju je uljepšao kantautor Senad Bostandžić, a učenici su se predstavili sa svojim literarnim radovima. Događaju su prisustvovali članovi bibliotečke sekcije Doma kulture "Mali bibliotekari", te članovi školskih bibliotečkih, literarnih i recitatorskih sekcija.



Učenci Međunarodne škole osvojili drugo mjesto na svjetskom takmičenju „INFOMATRIX“

U periodu od 27. aprila do 1. maja 2017. godine u Bukureštu, Rumunija, održano je petnaesto po redu takmičenje iz informatike „INFOMATRIX“. Na takmičenju je učestvovalo preko 600 učenika iz 45 država.

Našu državu su, u kategoriji „kratki film“, predstavljala dva učenika Međunarodne srednje škole, Nikšić Mirza i Spahalić Nedžad. Mentor učenicima je bila profesorica informatike Granulo Aida.

Učenici su na zadanu temu „Preko trnja do zvijezda“ napravili film „THE BOOK“ i u konkurenciji od 60 filmova osvojili drugo mjesto i srebrnu medalju.

Aeroklub Ilidža državni prvaci

U organizaciji Aerokluba "Zenica", a pod pokroviteljstvom Zrakoplovnog Saveza Bosne i Hercegovine održano je Državno prvenstvo za avio modelare. Najviše sportskog uspjeha imao je Aeroklub "Ilidža", čiji su takmičari pobijedili u svim konkurencijama takmičenja te tako postali aktuelni državni prvaci za 2017. godinu.

Održani izbori za savjete MZ

Općinsko vijeće Ilidža je na četvrtoj redovnoj sjednici održanoj 23. februara 2017. godine donijelo Odluku o rapsivanju izbora za članove Savjeta mjesnih zajednica koji su i održani 23. aprila 2017. godine u 15 mjesnih zajednicama na području općine Ilidža. Izabrani su novi članovi 15 Savjeta MZ kojima su povjerenje poklonili njihovi sugrađani.

Tehničari Prve osnovne škole osvojili prvo mjesto

Domaćin 18. smotre naučno tehničkog stvaralaštva mladih Općine bila je Deveta osnovna škola. Takmičenje je održano 8. aprila 2017. godine. Na takmičenju su učestvovali učenici iz 11 osnovnih škola.

Prvo mjesto osvojili su tehničari Prve osnovne škole koju su predstavljali učenici: Hadžera Čelović, Jasmin Čubrilo, Sara Hubijar i Imran Medović. Drugo mjesto bili su učenici Druge osnovne škole. Takmičari su su bili : Belma Salčin, Elmedina Gibanica, Medina Gadžo, Azra Pamuk i Anesa Čosić.

Treće mjesto su podijeli Četvrta i Deveta osnovna škola. Četvrtu osnovnu školu predstavljali su Muhamed Džihić, Adem Džihić, Adela Čohodar, Adil Tutun i Anida Hebibović.

Devetu osnovnu su predstavljali Ena Dorić, Ena Musa, Berina Karić, Nejra Sinanović i Azra Alekić.



U projektu "Građanin" najbolja Šesta osnovna škola

Općinsko takmičenje iz projekta "Građanin" u organizaciji "Civitas" održano je 8. aprila 2017. godine u Prvoj osnovnoj školi. U kategoriji osnovnih škola Šesta osnovna je bila najbolja, druga je Peta, a treća Prva osnovna škola.

U kategoriji srednjih škola pobjednici su Međunarodna srednja škola, druga Četvrta gimnazija, a treće Sarajevo koledž. Realizaciju ovog projekta pomogla je Općina Ilidža.



Prva samostalna izložba perspektivne Nejre Hujdur

U povodu 6. aprila u Drugoj osnovnoj školi učenica ove škole Nejra Hujdur upriličila je prvu samostalnu izložbu likovnih radova.

Nejra je rođena 6. februara 2002. godine u Sarajevu. Kako nam je rekla, još kao mala djevojčica imala je više privlačnosti prema slikovnicama od crtanih filmova i smatra da su od tada počeli njeni prvi koraci sklonosti ka umjetnosti. Njena porodica, prijatelji i nastavnici su je cijelo vrijeme podržavali i davali joj smjernice.

"Sanjajte i slijedite svoje snove. Ne odustajte na prvoj prepreci jer se više cijeni ono do čega teže dođemo i oko čega se pomučimo" kaže ova mlada umjetnica koja je naglasila kako vjeruje da umjetnost oplemjenjuje čovjeka i svijet čini ljepšim.

Posebnu zahvalnost je istakla direktorici Arneli Trešnjo koja joj je pomogla da njeni radovi ugledaju svjetlo dana.

Izložba je bila prodajnog karaktera, a skromna sredstva koja je zaradila utrošit će za kupovinu novog promaterijala.



Aktivisti Aleje očistili lokalitet oko Rimskog mosta

Aktivisti Ekološkog udruženja "Aleja" 9. aprila 2017. godine očistili su zelene površine i obale na lokalitetu Rimskog mosta, te sakupili veću količinu sitnog i kabastog otpada. U koordinaciji sa Kantonalnom javnom ustanovom za zaštićena prirodna područja "Vrelo Bosne" sakupljeni otpad je prevezen i deponovan na zakonom propisano mjesto.

Dejan Srzić –Susla bio gost KK ILidža

Gost Košarkaškog kluba Ilidža 8. aprila bio je Dejan Srzić-Susla, koji je igračima i trenerima održao tri pokazna treninga. Kako su nam rekli iz ovog kluba bila im je čast i zadovoljstvo ugostiti najboljeg trenera u Evropi za rad sa mladim igračima, čovjeka koji je radio u najvećim evropskim klubovima, sa velikim košarkaškim zvjezdama.

Osvajač je 12 zlatnih, dvije srebrene i tri bronzane medalje, sa raznim klubovima u Evropi, te reprezentativnim selekcijama. Dovoljno je nabrojati imena igrača sa kojim je radio: Dražen Petrović, Vlade Divac, Dejan Bodiroga, Aleksanad Đorđević, Saša Danilović, Toni Kukoč, Dino Rađa, Predrag Stojaković i ostali.

"Ovo je za sve nas bilo jedno novo i veliko iskustvo a Susla je još jednom pokazao bezgraničnu energiju, znanje, ljubav prema košarci, te nama trenerima i našim igračima otvorio nove spoznaje o igri koja se jednostavno voli. Susla je obećao da će se slični projekti nastaviti u budućnosti, što nam je i cilj" rekao nam je Admir Sakoč iz KK "Ilidža".

Završeno općinsko takmičenje iz košarke, fudbala i odbojke

Općinsko takmičenje učenika osnovnih škola iz košarke, fudbala i odbojke završeno je 5. aprila 2017. god. U Kulturno – sportskom i rekreacionom centru Ilidža podijeljene su medalje i pehari najboljima. Takmičenje je održano pod pokroviteljstvom Općine Ilidža. U kategoriji odbojke u ženskoj konkurenciji prvo mjesto pripalo je Prvoj osnovnoj školi, drugo Petoj osnovnoj školi, dok je treće osvojila Druga osnovna škola. U košarki, u muškoj konkurenciji prvo mjesto osvojila je Peta osnovna, drugo Četvrta osnovna škola i treće mjesto zauzela je Treća osnovna škola. U fudbalu u muškoj konkurenciji prvo mjesto je pripalo Desetoj osnovnoj, drugo Četvrta osnovna i treće mjesto Deveta osnovna škola.



Basket KUP Ilidža 2017



Košarkaški klub Impuls je od 13. do 16. aprila uspješno organizovao Peti internacionalni turnir u košarci za mlađe kategorije BASKET KUP ILIDŽA 2017.

Na ovogodišnjem turniru učestvovala su 62 ekipa iz Italije, Slovenije, Hrvatske, Srbije, Bosne i Hercegovine, sa više od 700 košarkaša i košarkašica.

U periodu od tri dana odigrano se 130 utakmica u sedam starosnih selekcija: mini basket, predpioniri-predpionirke, pioniri, kadeti i juniori-juniorke.

Utakmice su se igrale u salama KSC Ilidža, Hotela Hollywood, Ramiz Salčin i Merkator Dobrinja. U svim selekcijama su za najbolje plasirane ekipe uručene nagrade pehari, medalje i statue za najperspektivnije igrače



Izdaje Općina Ilidža • Uređuje Služba za obrazovanje, kulturu, sport i informisanje

Telefon u službi 033/761-011, Fax: 761-010 • www.opcinailidza.ba

DTP: Srednja tehnička škola grafičkih tehnologija, dizajna i multimedije Ilidža

Štampa: BLICDRUK d.o.o. • Tiraž 2000